

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 14.6.2012 18.05 Uhr auf 94.0 bzw. 87,7

Leev Toehörers,

wenn Se disse Sendung hören, dann sünd sünd Se an Foetball interessert un hebben seker dat Spöl van Düütskland tegen Holland güstern in de Kiekkast sehn. Junge, wat hebb ik mi freit, dat Düütskland mit 2:1 wunnen hett. Ik was güstern de hele Dag mit de nederlandske Konsul **Johannes Riepma** in Holland. Natürelk hebben wi uns up uns Treffen ok over dat Foetballspöl unnerhollen. De Hollanders, mit de wi dat toe doen harren, hebben natürelk för Holland tippt. Ok de düütske Konsul! He meente dat Holland mit 2:1 winnen dee. Nu mutt ik noch vertellen, dat ik bi de Tipp, de de Emden Zeitung dörföhrt, mit maak. Un ik stunn bit güstern mit 9 Punkten gaar neet so schlecht dor. För dat Spöl Portugal tegen Dänemark hebb ik güstern 1 Punkt kregen. As ik vandaag in `t Bladd kiek, was ik platt. Anstatt 4 Punkten, stunn dor blot 1 Punkt för mi. Ik hebb gau nakeden, wo dat kunn. Un wat sall ik seggen, ik hebb in `t Internet dat Spöl verkehrt ingeven. Hebb dor 2:1 för Holland tippt. Junge, wat hebb ik mi argert. Hett seker dormit toe doen hat, dat de Konsul so faak van ´n 2:1 Sieg van de Hollanders up de Rüggtuor in uns Auto proot hett.

Man dat sünd ja noch heel völ Spölen bi de Europameisterskupp un villicht kann ik dat weer uphalen.

Man nu ennelk toe Kickers Emden. De eerst Mannskupp spölt ja immer noch neet. Dat geiht eerst weer na de Sömmerpaus los. Man dann könt wi uns up heel spannende Oostfreesenderbys freien.

De **U19** van Kickers Emden hett in Osterholz-Scharmbeck mit 2:2 een Punkt haalt. Wall Langenhagen up egen Platz tegen Lünebürg verloren hett un Kickers mehr Toren as Langenhagen skoten hett, is de Mannskupp Tabellenföhrer. De Toren för Kickers skoten **Andreas Fleßner** in de 30. un **Tilo Janßen** in de 81. Menüte, also kört vör Schluss toe dat 2:2..

Nu könt sük all Foetballfrünnen in Emden up dat Spöl Saterdag um Klock 4 in de Oostfriesland-Stadion tegen Langenhagen freien. Kickers bruukt neet maal winnen, blot Unentschieden, dann sünd se Meister in de Foetball-Neddersassenliga. Ik bün mi seker, dat ´n Bült Lü sük dit interessante Spöl ankieken. Was de Jungs ja würrelk toe gönnen.

De **U15**-Mannskupp van Kickers Emden verlor hör Spöl up egen Platz tegen BV Cloppenburg mit 1:3. De Jungs hebben neet schlecht spölt. Ja, se kunnen dör **Tido Janssen** sogaar in de 50. Menüte toe dat 1:1 utglieken. Kickers harr ´n Bült Kansen wiedere Toren toe sketen. Man de wurren neet utnützt. Man lesden Enn wassen de Trainers mit hör Jungs toefree. Platz 8 in de Tabell hollen un mit de Ofstiegerei nix toe doen hebben, dat is ja ok al wat in disse Klasse.

De **Damen-Mannskupp** van Kickers Emden wunn in de Bezirksliga tegen de STV Barssel mit 4:1. Trainer **Edo Oltmanns** was mit sien Damen bestens toefree. He sach moi Toren van sien Mannskupp un wunnerbaar Paraden van sien Torfrau **Julia Bakker**. De Toren för Kickers Emden skoten **Steffi Burichter**, **Steffi Schröder** un twee Maal **Sabrina Köhler**. De 5. Platz skient seker toe wesen, ok wenn noch een Spöl tegen de Meistermannskupp an de komende Wekenenn in Emden usteiht.

De Jögdspöler **Julian Stöhr** van Kickers Emden spölt an 16. und 17. Juni in Bremerhaven bi de Noorddüütske Landenpokal in de U-14 Mannskupp (Jahrgang 1998). De jung Kickers-Spöler wurr van Wulf-Rüdiger Müller in de Neddersassenutwahl nonimeert. Dortoe kann man de Jung blot graleren.

Leev Toehörers,
vannabend steiht bi de Europameisterskupp dat Spöl Spanien tegen Irland an. Ik hebb 3:0 för Spanien tippt. Bün gespannt, of ik recht ligg.

So, nu as alltied, noch 'n Foetballwitz:
Een Foetballspöler is foul worden un humpelt mit 'n pienvertruckene Gesicht up dat Spölfeld herum. Dor meent de Trainer toe de Vereinsmasseur: „Bi de weet man noit, of man de Doktor of de Theaterkritiker komen laten sall.“

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.
Bit anner Maal
Joe
Erich Bolinius
ut Emden-Petjem.